

- प्रधानमंत्री नरेन्द्र मोदी जोधपुर ऊं 5 हजार करोड़ रुपया री विकास री न्यारी-न्यारी परियोजनावां री नींव रखी अर पूरा व्ह्या काम जनता ने सूप्या।
- प्रधानमंत्री कह्यो-प्रदेश मांय भाजपा री सरकार बणबा री सूरत मांय पेपर लीक माफिया रे खिलाफ करडी कार्रवाई करी जावेला।
- मुख्यमंत्री अशोक गहलोत विजन-2030 डॉक्यूमेंट जारी कीनो।
- राज्य सरकार संविदा रा आधार ऊं काम करण वाळां ने नियमित करण सारू साढे 10 हजार ऊं बत्ता नुवा ओहदा बणावण री मंजूरी दीनी।

000

प्रधानमंत्री नरेन्द्र मोदी मांय कह्यो है के केंद्र सरकार राजस्थान मांय रेल अर सड़क ऊं जुड़्या बुनियादी ढांचा रा विकास सारू काम कर रही है। वे जोधपुर मांय राखी ज्यी जनसभा मांय कह्यो के केंद्र हर हलका मांय तेजी ऊं विकास माथे ध्यान दे रह्यो है। प्रधानमंत्री कह्यो के राजस्थान मांय रेलवे रा विकास सारू करीब 95 अरब रुपया आवंटित करी ज्या है, जो लारली सरकार रा सालाना औसत बजट ऊं करीब 14 गुणा बत्तो है। प्रधानमंत्री कह्यो के आजदी पाछे ऊं साल 2014 ताई राजस्थान मांय करीब छह सौ किलोमीटर रेलवे लेणां माथे इंजन बिजली ऊं चालण लाग्या हा, जदके लारला नौ साल मांय तीन हजार सात सौ किलोमीटर ऊं बत्ती रेलवे लेणां माथे बिजली ऊं चालण वाळी गाड़ियां दौडबा लागी है। अमृत भारत स्टेशन योजना योजना रा तहत राजस्थान रा 80 ऊं बत्ता टेशनां ने और बेहतर बणावण रा काम कर्या जा रह्या है। श्री मोदी कह्यो के अब रेलवे टेशनां ने हवाई अड्डां री भांत विकसित कर्या जा रह्या है। वे कह्यो के आज सरू करी ज्यी रेल अर सड़क परियोजनावां ऊं राज्य रा विकास ने बधावो मिलेला अर इण ऊं स्थानीय माली व्यवस्था अर सैर सपाटा ने बधावो मिलेला।

प्रधानमंत्री आज जोधपुर मांय सड़क, रेल, विमानन, स्वास्थ्य अर आला दर्जा र भणार्ई-लिखाई सरीखा हलकां री कोई 50 अरब रुपया रा खर्च वाळी विकास री केई परियोजनावां देश ने सूपी। प्रधानमंत्री जोधपुर रा अखिल भारतीय आयुर्विज्ञान संस्थान-एम्स मांय साढे तीन सौ बिस्तरां वाळा ट्रॉमा सेंटर अर क्रिटिकल केयर हॉस्पिटल ब्लॉक अर प्रधानमंत्री-आयुष्मान भारत हेल्थ इंफ्रास्ट्रक्चर मिशन रा तहत बणाया जावण वाळा सात क्रिटिकल केयर ब्लॉक रा काम री नींव ई रखी। प्रधानमंत्री 11 अरब 35 करोड़ रुपया ऊं बत्ता खर्च ऊं बणायी ज्यो आईआईटी जोधपुर रो परिसर ई देश ने सूप्यो। प्रधानमंत्री जोधपुर हवाई अड्डा रा अत्याधुनिक नुवा टर्मिनल भवन रा काम री ई नींव रखी। ओ नुवो भवन 480 करोड़ रुपया रा खर्च ऊं 24 हजार वर्गमीटर हलका मांय विकसित कर्यो जावेला। प्रधानमंत्री जोधपुर रिंग रोड रा कारवाड़ - डांगियावास खंड ने चार लेन रो बणावण समेत सड़क विकास री 14 अरब 75 करोड़ रुपया रा खर्च वाळी केई परियोजनावां रा काम री नींव ई रखी।

वे जैसलमेर -दिल्ली बीचे नुवी रेलगाड़ी रुणिचा एक्सप्रेस अर मारवाड़ जंक्शन -कामलीघाट बीचे हेरिटेज रेलगाड़ी ने हरी झण्डी बता र रवाना कीनी। ई सागे ई प्रधानमंत्री दोवड़ी करीजी 145 किलोमीटर लंबी डेगाना-राई का बाग रेलवे लेण अर 58 किलोमीटर लंबी डेगाना-कुचामन सिटी रेलवे लेण ने ई जनता ने सूपी।

000

प्रधानमंत्री नरेन्द्र मोदी कह्यो है के देश मांय साल 2014 पाछे ऐंडी नीतियां बणायी ज्यी, ज्यां ऊं गरीबी तेजी ऊं कम व्हे रही है अर करीब साढे 13 करोड़ लोग गरीबी ऊं उबर ग्या है। प्रधानमंत्री आज जोधपुर मांय राखी ज्यी जनसभा मांय बोल रह्या हा। प्रधानमंत्री लोकसभा अर राज्यां री विधानसभावां मांय महिला आरक्षण बिल रो जिकर करता थकां कह्यो के ओ बिल पास व्ह्यां पाछे विपख बौखला ग्यो है। वे कह्यो के दुनिया मांय भारत रो दबदबो बध रह्यो है। प्रधानमंत्री कह्यो के देश री माली व्यवस्था दसवां नंबर ऊं उठ र पांचवीं मोटी माली व्यवस्था बण ग्यी है अर वो दिन दूर नी है जद देश दुनिया री तीजी मोटी माली व्यवस्था बण जावेला। प्रधानमंत्री कह्यो के राजस्थान मांय लारला 5 साल मांय सरकार नी चाली बल्कि 24 ई घंटा कुर्सी रो खेल चालतो रह्यो। लारला दिनां सामी आया 'लाल डायरी' रा मुद्दा रो जिकर करता थकां वे कह्यो के राज्य मांय भाजपा रो राज पाछो आवण री सूरत मांय भ्रष्टाचार ऊं जुड़्या सगळा राज खोल्या जावेला। प्रधानमंत्री कह्यो के कांग्रेस रा पेपर लीक माफिया प्रदेश रा लाखां नौजवानां रो भविष्य बर्बाद कर दीनो अर राजस्थान रा नौजवान इंसाफ मांग रह्या है। वे कह्यो के चुनाव री बगत बेरोजगारी

भक्तो देवण रो वायदो करण वाळी कांग्रेस पार्टी नौजवानो ने माफिया रे हवाले कर दीनो। प्रधानमंत्री कह्यो के राज्य मांय भाजपा री सरकार आवण परां ऐड़ा हर माफिया रे खिलाफ करड़ी कार्रवाई करी जावेला।

वे कह्यो के कांग्रेस री महिला विधायक खुद असुरक्षित महसूस करे है, ऐड़ा हालात मांय सरकार प्रदेश री टाबरियां री हिफाजत कयां कर सकेला।

प्रदेश मांय न्यारी-न्यारी ठौड़ां महिलावां रे खिलाफ अपराध री वारदातां रो जिकर करता थकां प्रधानमंत्री कह्यो के भाजपा आवेला तो महिला सुरक्षा लावेला। वे कह्यो के कांग्रेस ने बेटियां री परेशानी ऊं मतलब नी है। प्रधानमंत्री कह्यो के राज्य मांय पाणी री समस्या है अर केंद्र सरकार हर घर मांय नळ रे जरिये पाणी पूगावण री मंशा राखे है, पण अठे री सरकार काम मांय अड़चन डाल रही है। बाद मांय राज्यपाल कलराज मिश्र प्रधानमंत्री ने वां री लिखी पोथी **शिक्षा की संस्कृति** री प्रति भेंट कीनी।

000

उपराष्ट्रपति जगदीप धनखड काल एक दिन रा दौरा सारु राजस्थान पधारेला। वे सीकर जिला रा लक्ष्मणगढ मांय मोदी विज्ञान अर प्रौद्योगिकी विश्वविद्यालय री विद्यार्थियां ने सम्बोधित करेला। उपराष्ट्रपति रो त्रिवेणी धाम, सांगलिया धूणी अर वीर तेजाजी मिन्दर मांय दर्शन करण रो ई कार्यक्रम है।

000

मुख्यमंत्री अशोक गहलोत आज जयपुर मांय राख्यी ज्या जळसा मांय विजन-2030 डॉक्यूमेंट जारी कीनो। ई दौरान वे 12 हजार 700 करोड़ रुपया रा खर्च वाळा विकास रा कामां री नींव रखी। कार्यक्रम मांय गहलोत कह्यो के जो वायदा कीना, वे पूरा कीना है। मुख्यमंत्री कह्यो के घोषणा पत्र ने कैबिनेट मांय रखवायी ज्यो अर वां रा हिसाब ऊं योजनावां बणायी ज्यी। गहलोत कह्यो के वां री सरकार काम करण मांय कोई कमी नी राख्यी। वे ओला, उबर, स्विगी अर जोमैटो समेत इंटरनेट आधारित कम्पनियां मांय काम करण वाळा डिलीवरी बॉय अर कैब चलावण वाळा सरीखा कामगारां ने राजस्थान सरकार सागे पंजीकरण करावण परां सरकार री ओर ऊं हेलमेट, ड्रेस अर जूता री खरीदी बाबत पांच-पांच हजार रूपया देवण रो ऐलाण कीनो। वे कह्यो के अब टाबरियां अर महिलावां रा रोडवेज मांय मासिक पास परां किराया मांय 90 फीसदी छूट दी जावेला। गहलोत मंत्रालयिक कर्मचारी निदेशालय बणावण रो ऐलाण ई कीनो।

000

मुख्यमंत्री अशोक गहलोत आज जयपुर मांय वां रा रेहवास ऊं एक सौ फर्स्ट रिस्पॉन्स व्हीकल-एफआरवी ने हरी झंडी बता र रवाना कीनी। अ गाड़ियां न्यारा-न्यारा जिलां मांय पुलिस ने दी जावेला। आं गाड़ियां मांय आधुनिक मोबाईल डाटा टर्मिनल, कैमरा, एनवीआर, वायरलेस सेट, जीपीएस पब्लिक एड्रेस सिस्टम, फर्स्ट एड बॉक्स, स्ट्रेचर, हेलमेट अर मुसीबत री बगत काम आवण वाळा दूजा साज-ओ-सामान लागयोडा है। अ गाड़ियां कमाण्ड कन्ट्रोल सेन्टर्स मांय ईआरएस डायल 112 ऊं जुड़ी रेहवेला, जिण री वास्तविक लोकेशन री ई तुरत जाणकारी करी जा सकेला। जनता कानी ऊं मुसीबत री बगत 112 नम्बर डायल करण परां फोन री जाणकारी नजदीकी एफआरवी ने भेज दी जावेला जिण ऊं वां ने तुरत मदद मिल सकेला अर अपराधां री बेहतर तरीका ऊं रोकथाम तैय करी जा सकेला।

000

राज्य सरकार राजस्थान कॉन्ट्रेक्चुअल हायरिंग टू सिविल पोस्ट्स रूल्स-2022 रा तैत संविदा रा आधार ऊं काम कर रह्या 10 हजार 528 कर्मचारियां ने नियमित करण सारु नुवा ओहदा बणावण री मंजूरी दे दीनी है। महात्मा गांधी नरेगा रा तैत संविदा रा आधार ऊं 9 साल या बत्ता बगत रो अनुभव राखण वाळा कर्मचारियां सारु 4 हजार 966 नुवा ओहदा बणाया जावेला। मदरसा बोर्ड मांय संविदा रा आधार ऊं काम कर रह्या 5 हजार 562 कर्मचारियां सारु ई नुवा ओहदा बणावण री मंजूरी दीरीजी है।

000

विश्वकप क्रिकेट-2023 होड़ आज सरु व्ही। अहमदाबाद रा नरेन्द्र मोदी स्टेडियम मांय इंग्लैण्ड अर न्यूजीलैण्ड बीचे खेल्या जा रह्या पहला मुकाबला मांय न्यूजीलैण्ड टॉस जीत र इंग्लैण्ड ने पहली बल्लेबाजी करण सारु बुलायो। इंग्लैण्ड री टीम तैय पचास ओवर रा खेल मांय 282 रन बणाया अर वां 9 खिलाड़ी आउट व्ह्या। जो रूट सब ऊं बत्ता 77 रन बणाया। जवाबी पारी मांय न्यूजीलैण्ड री टीम आखिरी समाचार मिलण ताई 58 रन बणा लीना हा अर वां रो एक खिलाड़ी आउट व्हे ग्यो हो।

000